

Magpupursigi an BHB ha pagserbi ha katawhan ngan pagsulong han gerra han katawhan tubtob ha kadaugan

*Jose Sumoroy, Tagapagyakan
Efren Martires Command
Bagong Hukbong Bayan-Sinirangan Bisayas
Marso 29, 2003*



HA OKASYON HAN IKA-34 NGA anibersaryo han BHB, ginpapa-sidunggan han Efren Martires Command an mga rebolusyonaryo nga martir, an ngatanan nga Pula nga kumander ngan mangaraway, ngan rebolusyonaryo nga masa ngan tagsuporta hini ha Sinirangan Bisayas. Tungod han ira mabayanihon nga mga paningkamot, pagsasakripisyo ngan suporta, nahimo han BHB nga padayon nga makatirok hin kusog ngan makakab-ot hin bag-o nga mga kadaugan dinhi ha rehiyon, nga signipikante nga amot ha pankabug-osan nga pagpapasulong han gerra han katawhan ha bug-os nga Pilipinas.

Diri harumamay an naamkon nga mga kadaugan ha Sinirangan Bisayas han BHB ngan rebolusyonaryo nga armado nga pakig-away ha giya han PKP tikang han syahan nga tumurok an liso han rebolusyon dinhi sobra traynta katuig na an nakakalabay. Tikang ha waray, nagtubo an BHB dinhi tubtob maabot hini an presente nga kadakuon nga katugbang hin 3 kabatalyon, nga ginsusuportahan hin mga yunit milisya nga may kadakuon nga

katugbang hin 7 kabatalyon. Epektibo nga nagios yana an BHB ha damo nga mga sona ngan baseng gerilya ha dako nga mayorya han mga probinsya ngan mga bungto ha bug-os nga rehiyon, kun diin nakakatagamtam ini hin suporta han baseng masa nga maabot hin pira kagatos kayukot an kadamuon yana.

Tungod kay nagpursigi ini nga bug-os ngan hul-os nga magserbi ha katawhan, nahimo makaiksister ngan makagtirok hin kusog an BHB ha rehiyon ha luyo han magkadirudilain nga magbangis nga kampanya han pamomoypoy han reaksyunaryo nga gubyrno ngan mersenaryo nga AFP. Sanglit, natatagamtaman hini an haluag ngan hilarum nga suporta ngan pagmayuyo han katawhan, labi na han pinakatiniyupi ngan rinaugdaug nga hibibilngan ha haluag nga kabaryuhan. Maisugon nga ginkakatinan han BHB an papel

...tikang ha paypayl

hini komo prinsipal nga armas han rebolusyon ha pagsusulong han armado nga pakig-away, nga amo an magpupukan han reaksyunaryo nga sistema nga nagpapakuri han katawhan. Nabulig an BHB ha pagpukaw, pagpagios ngan pag-organisa han masa han katawhan para ha rebolusyon, ngan pinaagi hini naiistablisar ngan napaparig-on an rebolusyonaryo nga pampulitika nga poder han katawhan ha haluag nga kabaryuhan. Komo madig-on nga armado nga sandigan, nabulig liwat an BHB ha pagpapasulong han agraryo nga rebolusyon nga prinsipal ginpapapelan mismo han masa nga parag-uma ha kabaryuhan.

An BHB in tinuod nga hukbo han katawhan nga waray kapareho ha kasaysayan han Pilipinas ngan hul-os nga kabaliktaran han ngatanan nga reaksyunaryo, mersenaryo ngan bandido nga hukbo, sugad han AFP. An mga Pula nga mangaraway ngan kumander in boluntaryo nga naapi ha BHB ha lus-ay nga katuyuanan nga pagserbihan an katawhan pinaagi han pagpartisipar ha pinakahitaas ngan mabayanihon nga porma han pakig-away – an armado nga pakig-away agud pukanon an dunot nga sistema ngan tukuron an bag-o nga talwas, murayaw ngan progresibo nga

katilingban. Natitirok ha sakob han BHB an nagtitikadako nga ihap han pinakamag-upay nga anak nga kalalakin-an ngan kababayin-an han rebolusyon tikang ha ranggo han masa nga parag-uma ha kabaryuhan, sugad man tikang ha ranggo han mga trabahador, kabatan-unan ngan estudyante, mga propesyunal, mga tawo ha simbahan ngan iba pa ha kasyudaran. Diri mapupukan ngan diri kaya matugbangan han reaksyunaryo nga kaaway an pagkaurusa, kamabayanihon, kamaisugon ngan kadisiplinado han BHB.

Ha atubangan han tikagrababe nga kadunutan, pagkaniyutiyo ngan pasismo han rehimen nga Macapagal-Arroyo ngan tikakusog nga pangginginlabot-militar han US ha Pilipinas, mas hugot an panginahanglan nga isulong an rebolusyonaryo nga armado nga pakig-away agud panalipdan ngan ig-undong an interes ngan mga katungod han katawhan. Ha ngaran han ngatanan nga Pula nga kumander ngan mangaraway ha rehiyon, gindedeklara han Efren Martires Command nga an BHB ha Sinirangan Bisayas in andam ha pag-atubang ha bag-o nga mga ayat agud isulong an rebolusyonaryo nga armado nga pakig-away ha bag-o ngan mas hitaas nga balitang.

Darawayon ha katawhan an reydy han BHB ha Calbiga

*Jose Sumoroy, Tagapagyakan
Efren Martires Command
Bagong Hukbong Bayan-Sinirangan Bisayas
Marso 12, 2003*



DARAYAWON HA KATAWHAN AN madinaugon nga pagreyd han BHB ha pwersa han pulisiya ha Calbiga, Weste Samar han Marso 8. Ginpan-himuwa hini an mga pagpakaraut ha BHB han rehimen nga Macapagal-Arroyo ngan AFP-PNP komo terorista ngan kriminal. Iginpakita dida han reydy an prinsipyado, disiplinado, ngan paghahasog han internasyunal nga mga balaud ha gerra an BHB — nga hul-os nga kabaliskaran

han iginpapakita han hilaba nga makangingirhat nga rekord han AFP-PNP kontra ha katawhan.

Sinulong ha bungto banda 5:30 han aga han Marso 8 an nagpakauniporme-militar nga mga Pula nga mangaraway, sakay hin mga dyip ngan trak. Tungod han elemento han sorpresa ngan abtik nga maniobra han BHB, nakontrol an

☞ *padayon ha paypay 3*

...tikang ha paypay 2

kapulisan ha bungto sakob hin 40 minutos. Walo nga pulis an napasurender ngan nakumpiskar an upat nga M16, usa nga shotgun, tulo nga 9mm pistola, usa nga .45 kalibre nga pistola, duha nga .38 rebolber, usa nga .22 pistola ngan iba pa nga higamit-militar. Ha bug-os nga kondukta han reyd, waray igindurot an BHB nga destroso ha kinabuhi ngan propyedad han mga sibilyan ngan ginrespetaran an mga katungod han mga nagsurender nga pulis nga *hors de combat*.

Usa nga dako nga tampalo ha rehimen nga Macapagal-Arroyo ngan AFP-PNP ini nga reyd ha Calbiga. Ha luyo han *heightened alert status* han PNP ngan AFP ngan han ira pauro-utro nga paghinambog nga kontrolado nira an "pase-orden" ngan "problema han insurhensiya", nagmadinaugon na liwat an mga gerilya nga rebolusyonaryo nga atakihon hira mismo ha ira kuta — pagpamatuod nga padayon nga nasulong ngan nagkukusog an armado nga rebolusyon.

Labaw ha ngatanan, ginpamatud-an han atake ha Calbiga nga natatagamtaman han BHB an haluag ngan hilarum nga suporta han masa han katawhan. An aktibo nga suporta han masa ha BHB tikang ha pangangandam tubtob ha pag-atras an yawe ha pagin madinaugon han reyd. An kahibuyagyag hini ha haluag nga publiko in dako nga kaarawdan ha rehimen nga Macapagal-Arroyo ngan AFP-PNP, nga pirit nga namomostura nga kulaos suportado han katawhan ngan para ha katawhan.

Ha desperasyon nga makabulos ngan ha kawaray hin iba nga isyu nga poyde gamiton kontra ha BHB, waray-basehan nga ginpipinasamwak han militar ngan pulisya ha Rehiyon 8 nga mga menor-de-edad an mga Pula nga mangaraway nga nagronda ha Calbiga. Hul-os ini nga waray kamatuoran. Labot han paghasog ha kalugaringon bataan-balaud, sinsero nga gintutuman han BHB an obligasyon hini ha mga internasyunal nga makatawo nga balaud, lakip na an diri pagrekluta hin mga menor—de-edad. An prinsipyado nga kondukta han BHB ha pagreyd han Calbiga han Marso 8 an amo mismo an nagpapamatuod hini.

Mensahe tikang ha NDF



Ginsasaluduhan han Sinirangan Bisayas an Bagong Hukbong Bayan, an tinuod nga hukbo han katawhan

Fr. Santiago "Sanny" Salas

*Tagapagyakan ha Sinirangan Bisayas
National Democratic Front of the Philippines*

Marso 29, 2003

HA IKA-34 NGA ANIBERSARYO HAN pagtagbo yana nga adlaw han Bagong Hukbong Bayan, iginpapaabot han NDFP ngan han katawhan ha Sinirangan Bisayas an pinakamapaso nga pagpasidungog ha ngatanan nga Pula nga kumander ngan mangaraway ha rehiyon. Amon ginsasaluduhan an Bagong Hukbong Bayan para han katangkuran hini ha pagserbi ha katawhan ngan ha rebolusyonaryo nga armado nga pakig-away agud makab-ot an nasyunal ngan pankatilingban nga katalwasan. An BHB an tinuod nga hukbo han katawhan. Tikang han diktadura nga Marcos kutob han sumunod nga mga reaksyunaryo nga rehimen, gin-undong han BHB an mabayanihon ngan makatadungan nga gerra han katawhan ha Sinirangan Bisayas ngan ha bug-os nga nasud. Padayon nga gintutuman han pinakamag-upay nga anak han pira na nga henerasyon han parag-uma, trabahador ngan mga butnga nga klase an ira patriyotiko nga responsibilidad ha pagserbi pinaagi han pag-api ha hukbo han katawhan.

Gindadayaw namon an pagmentinar han BHB han kalugaringon dungog luyo han pinakamahugaw nga kampanya han pagpakaraut ha hukbo han katawhan han Gubyerno han Republika han Pilipinas (GRP) komo terorista nga organisasyon. Kun itanding ha maranggat nga rekord han BHB ha sobra tulo kadekada nga

☞ padayon ha paypay 4

...tikang ha paypay 3

pagseserbi ha katawhan ngan pakatagamtam han ira madig-on nga pagtapod, an kanan GRP pagpapakaraut ha BHB in masesering nga pungkay han desperasyon ngan kawaray hingaradtuan. Deperado nga naungay an AFP ngan PNP yana ha pinakamaitom nga propaganda kontra ha BHB tungod kay diri nira napupugngan an dirudiretso nga pagtubo hini. Pinaagi han pagbinuwa-buwa, gin-aatentar nira nga matahuban an kamatuoran nga an militar ngan pulisya in papitad-pitad nga ginpupukan han rebolusyonaryo nga hukbo han katawhan nga maupay nga naarmasan ngan ginsusuportahan.

Gindadayaw han katawhan an BHB tungod han pagpanalipod hini han kinabuhi ngan kaupayan han mga sibilyan ngan han maupay nga pagtagad hini han mga dinakop nga kaaway, ha butnga han kumplikado ngan mapintas nga gerra. Ha paglalansar han gerra han katawhan, gin-gigiyahan an BHB han mga rebolusyonaryo nga prinsipyo ngan pagsurundon sugad man han internasyunal nga mga balaud ha gerra. Hul-os ini nga kabaliskaran han kanan GRP kontra-rebolusyonaryo nga mga kampanya sugad han Oplan Gordian Knot, kun diin grabe nga gintatalapas han pasista nga AFP-PNP an mga katungod pantawo ngan internasyunal nga makatawo nga balaud. Ginpapatuman han militar ngan pulisya an terorismo han estado ha kabaryuhan pinaagi han pagharas, pagtortur ngan panmatay han ginsususpetsahan nga tagsuporta han BHB. Kun nadadakop o nawawarayan kapas nga umato, an mga kombatant nga BHB in ginhihikawan han ira mga batakan nga katungod,

gintotortur ngan arbitraryo nga ginpipriso o ginpapatay han mga sundalo ngan kapulisan han GRP.

Ha BHB, an katawhan in may-ada hukbo nga tinuod nga makikig-away para han ira mga katungod ngan interes. An pakig-away para ha tuna han mayorya han katawhan Pilipino nga mga parag-uma in diri magdadaug kun waray an BHB. Ginpupukaw, gin-oorganisa ngan ginpapagios han hukbo han katawhan an masa nga parag-uma para ha agraryo nga rebolusyon ngan ginpapanalipdan hini an mga kadaugan han ira mga pakig-away. Nahihimo makaiksister liwat an poder han katawhan tungod kay napapel an BHB komo sararigan nga kusog han demokratiko nga gubyrerno han katawhan nga ginpupundar ha kabaryuhan. Ha mata han katawhan, an BHB in prestihiyoso nga rebolusyonaryo nga hukbo tungod kay nakikig-away ini para han nasyunal nga katalwasan ngan demokrasya. Kabaliskaran ini han AFP, kanay mersenaryo nga kinaiya in mas labi nga nalandaw yana tungod han pagpailarum hini ha US militari ha serye han mga Balikatan nga ehersisyo.

Hingyap namon para ha mga Pula nga kumander ngan mangaraway an mas damo nga kadaugan ha natad pag-awayan ngan ha iba pa nira nga mga buruhaton. Makakaseguro an BHB ha padayon nga suporta ngan pagmayuyo han NDFP ngan katawhan.

Mabuhay an Bagong Hukbong Bayan, an tinuod nga hukbo han katawhan!

Kadaugan para han aton gerra han katawhan!



Mensahe tikang ha PKM

**Mabuhay an BHB, tinuod nga hukbo han katawhan!
Isulong an gerra han katawhan tubtob kadaugan!**

*Pambansang Katipunan ng mga Magasaka – Sinirangan Bisayas
Marso 29, 2003*

GINSASALUDUHAN HAN PKM HA SINIRANGAN BISAYAS AN NGATANAN nga Pula nga kumander ngan mangaraway, sugad man an mga rebolusyonaryo nga martir han Bagong Hukbong Bayan, ha okasyon han ika-34 nga anibersaryo hini. Hul-os nga iginkakalipay han rebolusyo-naryo nga masa nga parag-uma ha Sinirangan Bisayas an padayon nga pagtirok hin kusog ngan mga kadaugan han BHB, an tinuod nga hukbo han katawhan Pilipino. Ha kada pagsulong han rebolusyonaryo nga armado nga pakig-away nga prinsipal gin-uundong han BHB, nagkukusog an paglaum han pinakatiniyupi ngan rinaugdaug

...tikang ha paypay 4

nga klase ha katilingban Pilipino – an klase nga parag-uma – para ha tinuod nga reporma ha tuna, nasyunal nga industriyalisasyon, ngan tinuod nga demokrasya.

Tikang han syahan nga pagturok han liso han rebolusyon dinhi ha Sinirangan Bisayas, nagbuhis ngan padayon nga nagbubuhis an BHB hin mga pagsasakripisyo ngan pagkamabayanihon ha ngaran han pagserbi ha katawhan. Ilarum han pamumuno ngan paggiya han PKP, makurimot nga ginpupukaw han hukbong bayan an masa nga parag-uma ha ira amkon nga gahum ha paghimo han kasaysayan ngan gin-oorganisa an ira ranggo ha rebolusyon. Tungod hini, natukod ngan padayon nga nagkukusog an mga rebolusyonaryo nga organisasyon han masa ngan an demokratiko nga pampulitika nga gahum han katawhan ha haluag nga kabaryuhan ha rehiyon. Yawe an papel han BHB ha pagpatuman han rebolusyonaryo nga hustisya kontra ha pinakalanong nga kontra-rebolusyonaryo ngan magraut nga elemento nga may utang nga dugo ngan makarimadima nga krimen ha katawhan, sugad man ha pagbulig ha pagtuhay han mga tipatipa ha ranggo han katawhan. Ha mga pakig-away kontra ha pyudal ngan bagapyudal nga paniniyupi, nagin kabakyang an BHB ha pagpagios ngan pag-organisa han mga parag-uma, labot pa han pagserbi hini komo madig-on nga armado nga sandigan kontra ha pinakadespotiko ngan lanong ha kaaway nga klase ngan reaksyunaryo nga estado.



Ginkokondenar han
PKM an mga
malisyoso
nga pag-

pakaraut ha BHB han rehimen nga Macapagal-Arroyo ngan AFP-PNP komo terorista ngan kriminal. Batid an masa nga parag-uma, nga dako nga mayorya han populasyon han Sinirangan Bisayas nga an reaksyunaryo nga gubyrno ngan an mersenaryo nga hukbo hini an tinuod nga mga terorista ngan kriminal. Hira an nagdudurot han nagtitikagrabe nga pagpasibaya, paniniyupi, panraugdaug, ngan panmamasista ha masa nga parag-uma. Waray iba nga matatagamtaman an rehimen ngan AFP-PNP tikang han masa nga parag-uma kundi an hilarum nga kangaralson ngan rebolusyonaryo nga pag-ato.

Nagtitikagrabe an kadunutan, pagkaniyutiyo ngan pasismo han rehimen nga Macapagal-Arroyo ngan an pangginginlabot-militar han US ha Pilipinas. Mas hugot an panginahanglan nga magpursigi an BHB ngan katawhan nga isulong an rebolusyonaryo nga armado nga pakig-away ngadto ha bag-o ngan mas hitaas nga balitang. Para hini, ginsasaad han PKM nga pakukusgon ngan pahahaluagon hini an mga rebolusyonaryo nga organisasyon han masa nga parag-uma agud maisa an kakayahan hini ha pagsuporta ha BHB ngan magserbi nga madig-on nga kuta an haluag nga kabaryuhan para ha armado nga pakig-away. Ipapasampa hini ha BHB an pinakamag-upay nga anak nga kalalakin-an ngan kababayin-an hini. Oorganisahon hini an kalugaringon ngadto ha mga kwerpo-ha-pagdependa-ha-kalugaringon ngan mga yunit milisya para magserbi nga reserba nga pwersa han BHB. Pararayhakon hini an mga kontra-pyudal nga pakig-away ngan kagiusan kooperatiba agud maisa an balitang han produksyon ha kabaryuhan ngan an kakayahan ha paghatag hin materyal ngan iba pa nga suporta ha BHB ngan armado nga pakig-away.

Mabuhay an Bagong Hukbong Bayan, tinuod nga hukbo han katawhan Pilipino!

Isulong an gerra han katawhan tubtob ha kadaugan!



Mensahe tikang ha MAKIBAKA

Gin-uundong han BHB an rebolusyonaryo nga pagtatalwas han kababayin-an

*Makabayang Kilusan ng Bagong Kababaihan-
Sinirangan Bisayas*

Marso 29, 2003

HA OKASYON HAN IKA-34 NGA anibersaryo han Bagong Hukbong Bayan, ginpapasidunggan han Makibaka an kalalakin-an ngan kababayin-an nga Pula nga kumander ngan mangaraway para han ira mabayanihon nga pagseserbi ha katawhan Pilipino ngan pagsusulong han rebolusyonaryo nga armado nga pakig-away.

Hilarum an pagsantop han Pula nga Hukbo ha rebolusyonaryo nga papel ngan importansya han kababayin-an ngan han ira mga katungod. Sugad han MAKIBAKA, ginkikilala han BHB an importante nga papel han kababayin-an ha paglalansar han rebolusyonaryo nga armado nga pakig-away para rumkon an dunot nga naghahadi nga sistema ngan kab-uton an nasyunal ngan sosyal nga katalwasan han katawhan Pilipino. Diri magdadaug an rebolusyon kun diri mapukaw, mapagios ngan maorganisa an kababayin-an. Katunga an kababayin-an han populasyon ha Pilipinas. Nag-aantos hira ilarum han reaksyunaryo nga sistema, labi na an kababayin-an nga parag-uma ngan trabahador diri la han makaklase nga paniniyupi ngan panraugdaug, kundi pati han diskriminasyon dara han ira pagigin babaye. An rebolusyonaryo nga dalan para ha nasyunal ngan sosyal nga katalwasan an dalan liwat para ha tinuod nga katalwasan han kababayinan nga Pilipino.

Ginrerekluta han BHB diri la an mga kalalakin-an kundi pati an mga kababayin-an tikang ha ranggo han rebolusyonaryo nga masa. Ginpapatuman han kababayin-an nga mga Pula nga mangaraway an mga responsibilidad panmilitar, pampulitika ngan iba pa hin may pantay nga mga katungod ngan pagtratar sugad han kalalakin-an nga mga kasama. Hugot nga

igindidiri an pagtiyupi ngan diskriminasyon ha kababayin-an ha prinsipyo ngan disiplina han BHB, nga istrikto nga ginhahasog ha sakob han organisasyon hini ngan sugad man ha pakigrelasyon ha masa han katawhan. May-ada giya ha tukma nga pakigrelasyon ngan pag-aasawa nga ginhahasog han BHB agud mapanalipdan an mga katungod han kababayin-an.

Ha haluag nga kabaryuhan, nabulig an BHB ha pagpukaw, pagpagios ngan pag-organisa ha masa nga parag-uma, upod an mga parag-uma nga kababayin-an. Pinaagi han mga organisasyon masa sugad han Makibaka, signipikante nga nakakaamot an mga parag-uma nga kababayin-an ha mga kontrapyudal nga pakig-away, kagiusan kooperatiba, magkadirudilain nga kampanya (literasiya, panlawas, kalinisan, kultural ngan iba pa), ngan pagsuporta ha hukbong bayan ngan armado nga pakig-away kadungan han pag-undong han ira mga katungod komo kababayin-an. Sugad man, magkadirudilain nga pamaagi an ginhihimo han rebolusyonaryo nga kababayin-an ha kasyudaran ngan kabungtuhan para suportahan an BHB ngan armado nga pakig-away ha kabaryuhan – prinsipal na dinhi an pag-api mismo ha BHB ngan paghatag hin suporta nga rekursu ha armado nga pakig-away.

Ha haluag nga kabaryuhan, kun diin hibibilngan an padayon nga nagkukusog nga rebolusyonaryo nga armado nga gahum han katawhan, aadto liwat mismo an rubas han nabangon nga rebolusyonaryo nga kagiusan han kababayin-an Pilipino.

Mabuhay an BHB, tinuod nga hukbo han katawhan Pilipino, tag-undong han rebolusyonaryo nga pagtatalwas han kababayin-an Pilipino!



Mensahe tikang ha KM

Diri “terorismo” kundi kadunggan an pag-api ha BHB ngan pagserbi ha katawhan

*Kabataang Makabayan-Sinirangan Bisayas
March 29, 2003*

GINSASALUDUHAN HAN KABATAANG MAKABAYAN-Sinirangan Bisayas an Bagong Hukbong Bayan ha ika-34 nga anibersaryo hini yana nga adlaw. Komo rebolusyonaryo nga organisasyon han mga Pilipino nga kabatan-unan – mga parag-uma, trabahador, kabras ha syudad ngan butnga nga klase – hul-os nga kalipay nga ginpapasidunggan han KM an usa nga kaalyado nga organisasyon ha sakob

han NDFP nga amo an prinsipal nga instrumento han rebolusyonaryo nga pakig-away. Pinakahitaas nga panawagan ngan responsibilidad han ngatanan nga kabatan-unan nga lalaki ngan babaye an pagkatin hin armas ngan pagserbe ha katawhan ha armado nga pakig-away ha kabaryuhan. Ha kamatuoran, an mga batan-on nga Pula nga mangaraway yana in kaudgan nagtikang ha mga tsapter han KM ha mga baryo sugad man ha mga syudad ngan bungto. Diri “terorismo” kundi kadunggan an pag-api ha BHB ngan pagserbi ha katawhan. Diri la iginririsgo han mga BHB nga mangaraway an ira mga kinabuhi ha natad pag-awayan kundi mabayanihon nga gin-aantos an magkadirudilain nga sakripisyo ngan kakurian agud la panalipdan ngan isulong an interes han katawhan.

Ha atubangan han nagpapadayon nga krisis ha ekonomiya ilarum han rehimen nga Arroyo, nawawarayan hin mga oportunidad an kabatan-unan ha Sinirangan Bisayas. Padayon nga ginhihigimat-an han kabatan-unan nga parag-uma ngan trabahador an permihan nga problema han kawaray tuna ngan diri-maaantos nga kakablasan. Kaudgan ha ira in pwersado magtrabaho ha temprano nga edad agud la suportahan an ira naghihimakuri nga pamilya ngan waray paglaum ha kabubwason ilarum han presente nga sistema. Napupukaw an ira

rebolusyonaryo nga potensyal tungod kay an ira mga pamilya ngan klase nga gintitikangan in rinaugdaug ngan tiniyupi. Bisan an mga batan-on nga estudyante ngan propesyunal in rinaugdaug han gipit nga kamutangan ngan nahiaagum han pagluos han ira pan-ekonomiya nga kamutangan.

Mas nagigin mahinungdanon an panawagan han pagkatin hin armas han mga batan-on ngan estudyante samtang nagtitikagrabe an panbibiktima ha ira han presente nga sistema. Tikadako nga ihap han mga batan-on ngan estudyante in naoorganisa ha mga tsapter han KM ha kabaryuhan ngan mga syudad ngan bungto. Dugang pa, permi gin-aaghat namon ha Kabataang Makabayan an amon kaapihan nga sumampa ha Bagong Hukbong Bayan ngan pagserbihan an katawhan. Ngani damo na an nagbaton han ayat ngan labaw nga mas damo pa an mabunyog ha diri mahuhubsan nga agos han masunod nga henerasyon han mga mangaraway para ha katawhan. Makakaseguro an BHB han padayon nga entusyasmong han KM para ha rebolusyonaryo nga armado nga pakig-away ngan mga batan-on nga rekluta para ha serbisyo.

Mabuhay an Bagong Hukbong Bayan!

Pagserbihan an katawhan, umapi ha Bagong Hukbong Bayan!

Mensahe tikang ha CNL

Magrayhak ha ika-34 nga anibersaryo han Bagong Hukbong Bayan

Christians for National Liberation-Sinirangan Bisayas
Marso 29, 2003



DARAWHUNON NGA MAYDA ORAS NGAN PANAHOON PARA HAN NGATANAN ilarum han langit, para han paghigugma ngan kangalas, para han gerra ngan para ha kamurayawan. Ginahandum han Christians for National Liberation (CNL) an ika-34 nga anibersaryo han Bagong Hukbong Bayan yana nga adlaw agud igpahinumdom ha ngatanan nga nagmamayuyo han kamurayawan nga aada kita yana ha panahon han rebolusyon ngan gerra han katawhan. Nag-aalsa an katawhan tungod han diri na maaantos nga kakurian han krisis nga durot han imperyalista nga globalisasyon sugad man han dunot ngan niyutiyo nga panggubyrnuhan ni Gloria Macapagal-Arroyo. Bisan ha langyaw nga labnasan, an bagyo han rebolusyon ngan pag-ato in nakanap ha kalibutan, labi na kontra han bag-o nga agresyon han imperyalismo nga US, nga nangangatake yana ha Iraq.

Nakaiksister an BHB ngada yana tungod kay makatadungan an dalan nga ginhahasog hini para hatagan hin hustisya an mga pankatilingban nga araba han katawhan. Desperado nga ginlaladawan han rehimen nga Arroyo an BHB komo nagpapabutho hin klima hin kahadlok. Ha kamatuoran, an rehimen nga Arroyo mismo an naghahadi pinaagi hin panhahadlok nga ginhihimo pinaagi han militarisasyon ngan mga balaud militar nga pitad ha butnga han ura-ura kagrabe nga kakablasan. Gintatagan hin duon han dunot ngan kontra-katawhan nga AFP-PNP ha kontra-rebolusyonaryo nga Oplan Gordian Knot hini an pagpapakaraut han BHB.

Sinemana ngan binulan nga nagpapagawas an AFP hin maitom nga propaganda ngan maghugaw nga intriga kontra ha PKP-BHB. Lakip hini nga buwa-buwa amo an pag-akusar ha BHB hin pangingkil, tagdamo nga panmatay, pagrekluta hin mga menor-de-edad, asasinasyon ngan larang hin pambobomba, ngan iba pa nga hinimo-himo. Regular nga ginpapakaraut han madumagko nga upisyal han militar ngan pulisya an BHB ngan gin-aayat nira an katawhan nga mamili giutan han gubyrno ngan rebolusyonaryo nga kagiusan.

Kundi, tungod kay gin-uundong han BHB an interes han katawhan, kausa han BHB an tingog han katawhan. Mayda mabayanion nga katuyuanan an BHB komo hukbo para han

pagtatalwas han katawhan kontra ha langyaw ngan dinhianon nga paghahadi. An diwa han pagkamabayanion ha pagserbi han Iroy-ngatuna an naglalain han BHB ha diwa han pagtatraydor han AFP nga nagpapanalipod han interes han magtiyupion nga klase sugad man komo niyutiyo nga hukbo han imperyalismo nga US. Ginsasarigan ngan ginmamayuyo han katawhan an BHB sanglit magkabunyog hira nga nakikig-away para ha talwas nga nasud, ha usa nga bag-o nga Pilipinas.

Sagrado nga obligasyon para han ngatanan nga nagmamayuyo han katalwasan nga makig-away para hini pinaagi han pag-api ha Bagong Hukbong Bayan. Damo ha mga tawo ha simbahan mismo ha Sinirangan Bisayas – mga kapadian, kamadrihan ngan mga pastor – in nagin rebolusyonaryo nga mangaraway ha BHB ngan ha demokratiko nga kagiusan han katawhan. Sanglit, mas labi nga iginkakalipay han CNL an pagpaabot han pasalamat han katawhan ngada ha BHB para han ngatanan hini nga pagsasakripisyo ngan makurimot nga pagpupursigi komo hukbo nga naghahawan han dalan ha butnga han kagurangan. Pirme nira matatagamtaman an pagmayuyo ngan suporta han katawhan.

Mabuhay an BHB, an hukbo para ha pagtatalwas han katawhan!

Mabuhay an demokratiko nga rebolusyon han katawhan!